

Siunnersuut: Inatsisartut inatsisaasa assigiinngitsut allangortinneqarnerat aamma akileraarutit akitsuutillu kiisalu aningaasanik nuussinikkut isertitat pillugit Inatsisartut inatsisaat nr. xx xx. xxx 2018-imeersoq.

Saqqummiussissut

(Aningaasaqarnermut Nunanilu Avannarlerni suleqatigiinnermut Naalakkersuisoq)

Siullermeerinninneq

Naalakkersuisut sinnerlugit matumuuna saqqummiutissavara akileraarutit akitsuutillu pillugit kiisalu ikiorsiissutit pillugit procenti aaqqiissutissaq pillugu Inatsisartut inatsisaasa assigiinngitsut allannguutissaat pillugit Inatsisartut inatsisissaattut siunnersuut.

2017-imi upernaakkut ataatsimiinnermi procenti aaqqiissutissaq aamma maannakkorpiaq aningaasarsiat pillugit Inatsisartut inatsisaat nr. 9 ulloq 1. juni 2017-imeersoq Inatsisartut akuersissutigaa. Ukiumi aningaasanut inatsiseqarfiusumi procenti aaqqiissutissaq pisortani atorfeqartut ukiumut akissarsiaasa allannguutaattut naatsorsorneqartassasoq inatsimmi taaneqartumi aalajangersarneqarpoq. Ukiumoortumik procenti aaqqiissutissap naatsorsorneqarnera saqqummiunneqarnissaalu Kalaallit Nunaanni Naatsorsueqqissaartarfiup suliassaqarfiata ataaniippoq.

Aningaasat nalinginnaasumik naleerukkiartornerat ilutigalugu pingaartumik aningaasanik nuussinikkut isertitat akitsuutillu annertussusaasa arlallit naleerukkiartornissaasa pinaveersimatinneqarnissaat siunertaralugu ingerlaavartumik iluarsiissuteqartarnissamut tunngavissamik qulakkeerinissaq procentip aaqqiissutissap siunertaraa.

Procentip aaqqiissutissap nalimmassarneqarnissaani pisortanit ikiorsiissutit annertussutsillu sorliit aallaavigineqassanersut procenti aaqqiissutissaq aamma maannakkorpiaq aningaasarsiat pillugit Inatsisartut inatsisaanni allassimangilaq. Tamanna siunnersuut una aqutigalugu aatsaat pivoq, tamatumani annertussutsit ilaat inatsisartut inatsisaanni assigiinngitsuni arlalinni aalajangersarneqartut ilaasa ingerlaavartumik iluarsivigineqartarnissaat pillugu maleruaqqusat atuutsinneqalissallutik.

Utoqqalinersiallit aamma siusinaartumik sulisinnaajunnaarnersiallit ullumikkutut pisartakkatik assigalugit siunnersuut naapertorlugu minnerpaaffissatut pisassavaat amerlasuutigullu ullumikkornit pitsaanerumik. Taamaalilluni siunnersuutikkut tapersorsorneqassaaq pisartagallit nalimmassaavigineqartut, nalinginnaasumillu akissarsiaqartut akornani aningaasaqarnikkut oqimaaqatigiissaarinerup allannguuteqartinneqannginnissaa. Taamaalilluni aningaasaqarnikkut naligiinnginneq annertusiartuinnartoq akiorneqassaaq.

Tamatumunnga peqatigitillugu akileraartarnikkut akitsuusiisarnikkullu akigititat ilaat ingerlaavartumik iluarsiivigineqartassapput, taamaalilluni nunatta karsiata isertittagaasa aningaasartuutigisartagaasalu akornanni pisarialimmik oqimaaqatigiissaarineq attatiinnarneqassaaq. Inatsisissatut siunnersuutikkut matumani immikkoortumi tassunga tunngassuteqartuni akitsuutit atuisut atuisarnerini nalinginnaasuni ilaminiinnaammata, atuisunut annikitsuinnarmik sunniuteqassasoq nalilerneqarpoq. Aammattaaq akitsuutit annertussusaasa qaffanneqartarneranni pisortani aningaasarsiat ineriartornerat malinneqassaaq. Taamaattumillu akitsuutit annertussusissaannik ukiumoortumik annikinnerusumik iluarsiiisuteqartoqartillugu atuisut amerlasuut ajornerusumik inissisimalersinneqassanngillat.

Siunnersuut annikinnerusumik iluanaaruteqarneruffiussangatinneqarpoq. Iluanaarutaanerussutit aningaasanik nuussinikkut isertitat iluarsiiisutaannut aningaasalersuutitut ilanngunneqassapput, tamatumani annertussusissat aningaasanut inatsisit aqqutigalugit iluarsiivigineqartassallutik. Tamatuma ilutigisaanik tamanna pissutigalugu siunnersuut pisortat siunissami aningaasaqarnerannut pitsanngoriaataanilu ajorseriaataassanngilaq.

Naggataatigut inatsisissatut siunnersuut tassungalu nassuiaatit innersuussutigissavakka.

Taama oqaaseqarlunga siunnersuut Naalakkersuisut sinnerlugit Inatsisartunut oqaluuserisassanngortippara.